



269 portrets da Medelinas e Medelins paradeschan el clavau vegl.



Tontas vischinas e tons vischins da Medel ves'ins darar enina.

FOTOS HANS HUONDER

«Fotografias fatgas cun cor»

Vernissascha dil cudisch e dall'exposiziun da fotos «Enta Medel» a Curaglia

DA HANS HUONDER/FMR

■ **269 vischinas e vischins da Medel han schau fotografar igl onn vargau da Martin Bichsel. La sonda sera ei il cudisch vegnius presentaus publicamein, las reacziuns ein trasatras positivas. Igl ei ina publicaziun unica e per la historia locala.** Spanegjai sil cudisch e probabel era sill'atgna fotografia ein biaras Medelinas e biars Medelins, mo era glied d'ordeifer la val, serendi alla vernissascha.

Las fotos ein exponidas il proxim temps en in clavau ella part veglia dil vitg da Curaglia. «Per arrivar tier quel astg'ins serender atras las gassas veglias dil vitg. Auter ch'ils indigens strusch enzatgi ch'enconuscha quellas bialas streglias e co ei vesa propi ora el coc dil vitg. Cheu ei il vitg aunc fetg vegls», di il president communal *Rico Tuor*. Leu – denter casas e clavaus – ha il fotograf *Martin Bichsel* saviu beneventar ina biala raspada da glied.

«Da tgi eis ti?»

Duront sia lavur da fotografar las Medelinas ed ils Medelins igl onn vargau ha Bichsel fatg novas experienschas culla val: «Gia daditg level jeu realisar in project da fotografias davart la Val Medel. Uss eis el daventaus realitad ed jeu hael empriu d'enconuscher la val da differents varts. Denter auter hael jeu fatg l'experiencia che la glied vul saver da tgi che ti eis. La glied vul saver ordinar tei.» Bichsel ha ragischs familiaras ella Val Medel, siu tat era derivonts da leu. A Soliva posseda la famiglia aunc adina duas casas. Fertion che Bichsel ei staus responsabels per tuttas fotos ei *Sabrina Bundi* sefatschentada dil questiunari, elegend ord quel rispostas che sepresentan el cudisch en fuorma da citats. *Curdin Albin* ch'ei carschius si a Curaglia ei staus responsabels per la grafica e la homepage e *Simon Bundi* ha fatg il lectorat. «Quella lavur ha fatg grond plascher a mi. Jeu hael empriu d'enconuscher fetg bia glied», di Bichsel.

In mument per la historia

La lavur da Bichsel croda «enta Medel» spirontamein sin laud. «Igl ei in fetg bi cudisch. Remarcabels ei secapescha il grond diember da persunas ch'ei stadas prontas da schar portretar», di Tuor. El lauda denton era l'elecziun dil pupi dil cudisch ch'ei cumpleinamein reciclabels e che respanda ina naturalitad, mo lu era ils citats che dattan veta alla publicaziun: «Igl ei bi d'haver aschia in product enta maun. El retern in mument dalla historia medelina.» *David Flepp* ch'habitescha a Danis, m mo ch'ha fermas ragischs familiaras in Val Medel e che di da sesez ch'el seigi Medelin cun tgiert ed olma di: «Ins senta che quella lavur ei vegnida fatga cun bia cor. Igl ei in product che respanda era la cordialitad dalla glied.»

«Ins ei sco ins ei»

Susanna Venzin-Giger ch'habitescha cun sia famiglia a Curaglia lauda il cudisch e l'exposiziun: «L'atmosfera en quei clavau ei tut speciala. Leutier vegn la glich che fa

las fotos aunc pli specialas.» Ella hagi buca saviu s'imaginar co ins vegli arranschar in'exposiziun en in clavau vegl, per quei motiv seigi ella surstada positivamein. «Las fotos ein il resultat dil mument che survegnan valeta cul temps», di Venzin-Giger e silla damonda, co sia foto plaigi ad ella, di ella: «Ins ei sco ins ei.» Fascinaus dalla lavur ei era *Claudio Pally* da Platta: «Igl ei ina super caussa. Las fotos originalas dian era bia dil caracter da mintgin(a).» Per fetg originala taxescha el era l'idea d'arranschar l'exposiziun en in clavau vegl: «Quei ei in da plirs clavaus ch'emigrants talians han construui entuorn 1900 ella Val Medel ed en auters loghens dalla Surselva.» Igl ei in clavau cun cantunadas da crap, il rest da lenn. A MBichsel reusseschi ei da presentar ils 269 portrets en ina moda captivonta en quei baghetg.

Il cudisch sa vegnir retratgs tier l'administraziun communal a Curaglia ni era empustaus sin la homepage www.entamedel.ch. El cuosta 38 francs. L'exposiziun ei aviarta ils proxims meins ed accessibla mintga di.

SUMVITG

Gie alla segirtad da Rabius

(fmr/sr) Cun 200 encunter 49 vuschs ha il suveran dalla vischnaunca da Sumvitg approbau il project e credit Val Luven. La participaziun all'urna ei stada tier biebein 26%. Per augmentar la segirtad el contuorn dalla Val Luven a Rabius po ussa vegnir priu differents mesiras. Ils cuosts persunter ein calculai cun 2,7 milliuns francs. Ils cuosts netto per la vischnaunca importan 750 000 francs. Cullas mesiras previdas vulan ins impedir ch'aua gronda caschuni donns vid infrastruttura sco baghetgs, vias e viafier. Quei ei numnadamein stau il cass differents gadas ils davos decenni.

Plinavon han votantas e votants eligiu cun 229 vuschs *Davide Beer* da Rabius en la cumissiun da baghegiar. (247 cedels ein vegni dai giu cun 234 vuschs valeivlas (tschun per singuls).

SURSAISSA MUNDAUN

Approbau quen annual 2019

(fmr/sr) La radunza communal da Sursaiassa Mundaun dil venderdis ha approbau il quen da vischnaunca annual 2019. Il quen siara cun in surpli dil recav da biebein 348 000 francs, quei tier entradas da 13,2 milliuns francs ed expensas da 12,9 milliuns francs. Ella bilantscha dils 31-12-2019 muossa il quen da vischnaunca in capital agen da 22,6 milliuns francs. Plinavon ha la radunza communal concediu in credit d'object dad 895 000 francs per la renovaziun dalla via da quartier Under Misnenga.

«La piazza da minigolf ei tier nus sco il gelato giul Tessin»

La piazza da minigolf nova a Breil ei vegnida inaugurada la sonda

DA SUSI ROTHMUND/FMR

■ **A caschun d'ina fiastetta ei la nova piazza da minigolf a Breil vegnida benedida, inaugurada ed aviarta la sonda vargada. La piazza ha custau rodund 170 000 francs e fa ina biala pareta en color mellen e blau.** La piazza da minigolf cun ustria da terrassa dat ei dapi 27 onns. Uss ei la piazza che sesanfla en ina foppa denter la piazza da golf ed il lag da Breil vegnida renovada dil taliter. La nova piazza ei vegnida construida d'ina firma tudestga specialisada e consista ord 18 differents vials da 6,25 meters lunghezia ch'han ina peisa da mintgamai 2,5 entochen 4,3 tonnas. Ils vials ein vegni produci ord betun per ch'ei detti buca donns da scheltira igl unviern.

In gaudi per tuts

Tenor *Marco Camartin*, il president dall'Associaziun Minigolf Breil, corrispunda la pista allas normas d'in plaz da turnier tenor il reglament uffical dalla Federaziun mundiala da minigolf. Aschia pon concorrenzas nazionalas ed internaziunalas haver liug leu. A quellas normas corrispundeva gia la piazza veglia, aschia ch'igl ei stau pusseivel da fundar il club da minigolf (1999) ch'ei medemamein commember da Swiss Minigolf. Actualmein dumbra il club da minigolf Breil 26 commembers activs. La piazza da minigolf nova ei adattada per pign e grond,



La piazza da minigolf a Breil ei adattada per pign e grond e corrispunda era allas normas per profis.

FOTO SUSI ROTHMUND

profis e famiglias cun affons. «Pils indigens ei minigolf in'occupaziun plitost spontana ch'ins gauda el rudi dalla famiglia ni amitgs. Il Club da minigolf Breil porscha in bien survetsch per la cuminonza en vischnaunca sco uniu activ», ha Camartin declarau.

Sco gelati el Tessin

«Pils hosps da vacanzas s'auda minigolf sco ils gelati giu el Tessin ni ell'Italia. Biars hosps apprezzeschan quella purschida.

Cunzun ils hosps dil Resort Pradas fan fetg bia diever digl implont, cunquei ch'il minigolf schai gest avon casa», aschia Camartin. Regularmein visetien era uniuns dalla Surselva il plaz da minigolf, denton era famiglias dalla regiun ni giuvenils cun lur clicas. Tenor *Kevin Brunold*, il menader da Surselva Turissem, ch'ha tenui in plaid a caschun dall'avertura ei la piazza da minigolf in'impurtont'attracziun da stad per la regiun: «Vus haveis fatg ina fetg, fetg buna lavur. Il percours vesa ora

Il dretg bal pil dretg mument

Tgei activitads ha il Club da Minigolf Breil el decuors d'in onn?

Marco Camartin, president Associaziun Minigolf Breil: Il Club organisescha sis turniers dil club. Quels han liug naven dil matg entochen igl october. Vitier vegn il turnier «Il Capricorn» ch'ha liug igl uost pils lizenziat dall'entira Svizra. Sper la piazza da minigolf dat ei era activitads: seigi quei cun in brunch communal, in viadi ni ina sentupada d'unviern. Igl unviern vargau havein nus saviu festivar ina premiera mundiala cul turnier da minigolf sin glatsch. Il punct culminont dallas activitads dil club ei segir l'organisasiun dils campinadis da minigolf il 2006 cun pli che 110 atletas ed atlets stada.

Tgei fascinescha Vus vid quei sport?

Per mei ei minigolf dapli che mo stuschar ina balla sur in obstachel viaden

en ina ruosna. Mei fascineschan il material da giug e las nundumbrevilas varianzas da dar aschia in vial. Seigi quei cun anflar la lingia perfetga naven dalla partenza en la ruosna, ni era ils characters dils bals (ca. 14 000 differents bals dat ei momentan sin la fiera). Il material ei fetg impurtonts. Secund sco la temperatura e tut tenor la humiditad dall'aria semida savens era il caracter dils bals. Lu ha ei num anflar il dretg bal per il dretg mument. Cun scaldar ni sferdentar selai aschia cureger las circumstanzias ch'ei forse quei mument buca gest idealas per manevrar il bal ella ruosna – secapescha cun ina solia suletta frida. Ins sa enconuscher aschi bein in plaz da minigolf – mo adina memia pauc per saver gir: Buca problem, quei percours hai jeu 100% sut controlla! E secapescha gaudel jeu la campignia. Igl ei empau sco en ina famiglia. La scena da minigolf ei pintga, ed ins enconuscha in l'auter per prenum.

fenomenal.» Dapi ch'ei dat la carta da hosps da Surselva Turissem ei la piazza da minigolf integrada en quella. Aschia dispona l'associaziun – che dumbra circa 240 commembers – mintg'onn d'in'en-

trada garantida. Per gronda part ha l'associaziun finanziau il project dalla nova piazza entras capital agen, il rest ha pudiu vegnir cuvretgs cun padrinadis dils vials e prestaziuns da tiazs.